

- r Von fasnacht narren.
- 1 Ich weiß noch ettlich faßnacht narren
 - 2 Die jnn der dorenkapp beharren
 - 3 Wann man heilig zyt sol vohen an
 - 4 So hyndern sie erst yederman
 - 5 Eyn teyl / die dünt sich vast berutzen
 - 6 Antlitt / vnd lib sie ganz verbutzen
 - 7 Vnd louffen so jn böucken wiß
 - 8 Jr anschlag stat vff hålem yß
 - 9 Mancher will nit / das man jn kennt
 - 10 Der sich doch selbst zů letsten nennt
 - 11 So jm der kopff schon ist vermacht
 - 12 Will er doch / das man vff jn acht
 - 13 Dz man sprech / schow min herr von Runckel
 - 14 Der kumbt vnd bringt am arm eyn kunckel
 - 15 Es muß jo ettwas groß bedütten
 - 16 Das er doch kumbt zů armen lüten
 - 17 Durch syn demüt vnß düt besehen /
 - 18 Syn meynung ist / er wolt gern schmehen
 - 19 Vnd eym zů faßnacht eyger legen
 - 20 Die guck guck syngend jn dem meygen /
 - 21 Kûcheln reicht man jn manchem huß
 - 22 Do wåger wer man blib dar vß
 - 23 Vrsach zů zelen / ist so vil
 - 24 Das ich vil lieber schwigen will /
 - 25 Aber die narrheyt hat erdacht
 - 26 Das man sůch freüden zů faßnacht
 - 27 So man der selen heyl solt pflegen

28 So gönt die narren erst den segen
 29 Vnd süchent dann jr fäst har für
 30 Das es vast nacht sy vor jr tür
 31 Der narren / kyrchwych man wol kennt
 32 Jo wol vast nacht würt es genennt
 33 Man loufft dar affter vff den gassen
 34 Jm moß / als solt man ymen fassen
 35 Welcher dann mag syn schöllig gantz
 36 Der meynt er hab billich den krantz
 37 Von eym huß zû dem andern loufft
 38 Groß füllen er on bar gelt koufft
 39 Des selb dick wårt noch mitter nacht
 40 Der tüfel hat das spiel erdacht
 41 So man solt süchen selen heyl
 42 Das man erst dantz am narren seyl
 43 Mancher der füll dût so vergessen
 44 Als solt er jn eym jor nit essen
 45 Vnd loßt sich nit benügen mit
 46 Das er sich füll biß metten zytt
 47 Verbottne spiß schadt dann nitt
 48 Man isßt die selb biß gegen tag
 49 Worlich ich das sprich / red / und sag
 50 Das weder Juden / Heyden / Datten
 51 Jrn glouben als schentlich bestatten
 52 Als wir die kristen wellen syn
 53 Vnd dünt mit wercken kleynen schyn
 54 So wir jm anfang vnser andacht
 55 Zû rüsten erst dryg / vier / vaßnacht
 56 Vnd werden erst on synnen gar
 57 Das selb das wert dann durch das jar

58 Brechen das houbt der vasten ab
 59 Do mitt sie mynder krefft hab /
 60 Wenig sich zů der äschen nahen
 61 Das sie mit andacht die entpfahen
 62 Förcchten die äsch die werd sie bitten
 63 Lieber wendt sie jr antlitt bschissen
 64 Vnd sich berömen / wie eyn kol
 65 Des tufels zeychen gefelt jn wol /
 66 Das zeichen gots / went sie nit han
 67 Mit Christo went sie nit erstan
 68 Die frowen gont dann gern zů strossen
 69 Das man sie dest baß künn bemossen
 70 Der kyrchen schonen ettlich nitt
 71 Sie louffen dryn / vnd durch die mitt
 72 Vnd dünt die frowen drynn beschmieren
 73 Das halt man für eyn groß hofieren
 74 Die wüst rott / dünt den esel tragen
 75 Der sie die gantz statt macht vmb jagen
 76 So ladt man dann zů dantz vnd stechen
 77 Do muß man erst die sper brechen
 78 Vnd bringen narren recht zů samen
 79 Buren / hantwerck / dünt sich nit schamen
 80 Vnd nemen sich ouch stehens an
 81 Der mancher doch nit ryten kan
 82 Des würt mancher gestochen dick
 83 Das jm der hals bricht oder rüch /
 84 Das soll eyn hübscher schympff dann syn
 85 Dar noch füllt man sich dann mit wyn
 86 Von keyner vasten weiß man sagen
 87 Das wesen wärt ob vierzehen tagen

88 Die fast gantz vß / an ettlich enden
 89 Die karrwüch düt sie kum abwenden
 90 So kumbt man zû der bicht zû zyt /
 91 Wann man die hültzen tafflen lüt
 92 So vacht man dann den ruwen an
 93 Das man well morndes wider dran
 94 Dem narren seil me hengen noch
 95 Gon Emaus ist vnß allen goch
 96 Die gwychten fladen vnß nit schmecken
 97 Das houbt das düt man bald entdecken
 98 Es mag gar licht eyn wynd har fegen
 99 Er düt den frowen die sturtz ab wegen
 100 Die hangen an den nächsten hecken
 101 Die frowen went sich vngern decken
 102 Reytzen do mitt die mann vnd knaben
 103 Die narrenkapp sie lieber haben
 104 Das man die oren dar vß streck
 105 Dann das man sich mit stürtzen deck
 106 Do mit so mag ich wol beschliessen
 107 Wie wol ettlich hant drab verdriessen
 108 Das / wo man sücht alleyn fastnacht
 109 Das nyemer druß wurt recht andacht
 110 Vnd wie wir schicken vnß zû gott
 111 Loßt er vnß dick biß jn den dott
 112 Die narrenkapp hat angst vnd nott
 113 Vnd mag nit so vil rüwen han
 114 Das sie doch blib die fasten stan
 115 Man streiff sie jn der karrwoch an

111 dott *GW5046*] gott *GW5047*